

條

麓

堂

集

條麓堂集卷之三十一

祭文一

祭史年伯文

惟公降靈于洛之渙式抱天倪克成世美順德宜家仁
風在里衆仰休聞天錫昌祉篤生柱史惟國之楨珪璋
特達蘭茝芳馨振穎中州飛英天宇在重能任當機必
剖帝試厥材尹茲東土絃誦澆漓桑麻斥鹵中田馴雉
北河渡虎帝簡厥能栢府是揚扣閭朱博攬轡范滂九
重耳目百辟紀綱凡此嘉猷惟公篤慶積善延祥貽經
昭訓于邦有光自天錫命朱紱方來鸞文輝映子奉闕

庭公居東洛尚友松筠結盟泉壑籃輿時駕春酒盈酌
勝地可遊嘉辰是樂多福具膺玄髮未改今茲何年乃
逢灾悔靈椿曉摧秋風不待某等昔隨柱史偕計登名
門牆安定聯座執經斷金投分倚玉生榮百年世講四
海交情既敦惠好實通休戚公訃忽傳我心則慙總惓
式瞻椒漿敬瀝篆烟彷徨靈駕若覲

祭李暘池文

嗚呼公之生也謂無以為耶曷其抱秀挺奇朗節修能
溫然玉立炳矣雲蒸遇重能任居有不矜固已文階朝
趨青瑣宵登彞章是典綸綍親承者矣其有以為也又

曷其干將初割旭日方升厥施未溥厥究未弘糾纏莫
測慶吊相仍將世之恤抑神所憎嗚呼哀哉昔歲癸丑
皇搜幽賤夫子司衡曰惟邦彥肆我同方彬彬旅薦北
海欽風荊州識面聯席師門彈冠帝里道術箴規飲食
燕喜倚玉者葭報瓊以李白首為期青春遽爾嗚呼哀
哉人孰無死今古同藏朝聞有述是曰不忘奚公之歿
劇我情傷公有老父垂白在堂公有弱子僂立在傍俯
仰寔依公歸胡鄉故國千里雲天杳茫旅櫬孤舟道路
悠長天風送淒行子沾裳敢陳束芻敬奠椒漿撫棺薦
詠詞短情長嗚呼哀哉尚饗

祭張南川翁文

嗚呼惟公德邵而豐氣厚而龐葆和于天繫重在邦斯
世幘幘後生紀綱謂且百年難老黃耆無疆彼蒼者天
胡不降康民之無祿公歸何鄉嗚呼河山雄鉅公誕其
傑熙運明昌公秉其哲中臺風紀三邊節鉞在重能任
當險不折詩書所稱古今為烈藐爾小子學道未能鄉
有哲人高山景行承風載悅覲德心傾徃捧遺編拜公
于里既進之門言提其耳雲霧方披茅塞若啓通事官
遊辭公于堂琴書清暇几杖康強經彼大猷示我周行
悠悠風塵適于京洛門牆非遐德音如昨閱歲方新徵

儀不作天喪哲人我將安倣
跂首興悲零淚如滾窅邐
心遙形留神徃公位雖隆公施未極公壽云高公神方
赫蒼生注望丹宸眷德天意難量公歸何急帝軫元忠
恩卹隆異司空卜域太常進謚國胄世延春綸諭祭生
死哀榮完名全節青簡有光白璧無缺短誄告虔椒漿
薦潔恒霍雲高薰葭風烈玄馭其臨篆烟若結尚饗

祭陳年伯文

嗚呼惟翁蹈德之豐貽慶之隆龍章鶴髮壽福康寧迨
百年而觀化托冥契于赤松豈不善始令終哉而胡訃
音之北乃使余徘徊侘傺不知涕出之無從念滔滔之

閱世若逝水之必東懼修名之不立結永誓于同心而
唯哲胤之好修兮揚休山立矯然南國之人龍清言披
拂豁我顙蒙淳襟薰炙鄙吝全融及時日之閒暇蒐百
代之遺文念此分陰之可惜兮夫何十年之內舟車南
北無異乎萍浪與蓬風寄言永嘆勝會難并幸前春復
聚于都門兮念昔遊若旦莫握手論心開樽談藝壯懷
猶昔而已驚斑鬢之侵尋將謂自今其永好兮冀來者
庶其寡悔胡昊天之不吊兮顧靈椿之不待覩嗣君之
乳乳鬱陶悲乎余心百年道誼四海弟兄義既難于離
合情尤貫于戚欣送素軻五月而遐征兮欲解纜其猶

未忍憶玄輶萬里而將寔兮思為翁執紼之靡因憂心
忡忡短誄告衷陳詞有極懷悼無窮尚饗

祭楊舜原翁文

嗚呼惟公神凝崧嶽手扶天章標均山立氣與雲翔十
載乘驄振紀陳綱萬言倚馬刻羽引商槐庭陰德芝社
清芳懿此流風耿耿在鄉司馬承休益弘厥式緯武經
文金聲玉色有謀必中無敵不克翊宋范韓匡唐稷契
人士觀刑華戎仰德懿此殊庸巍巍在國濬發厥祥煥
敷其華瑤環瑜珥桂茁蘭芽蟾窟聯香高步雲霞虎賁
列侍為王爪牙懿此餘慶燁燁在家百祿方將千齡未

艾鸞誥龍文綸巾荷帶坤軸達經神理攸昧丘陵變遷
仁賢顛沛天寔為之人將何柰其閭閻後生久沃德音
絲蘿新好耗蔭喬門倚玉增寵投瓊戴恩丹旄既揭玄
輶既轅潏山有悽音容不存體牲在薦清醑在尊長涕
陳詞敬酌蘋蘩尚饗

又代作

惟公萃靈蔭于世德衍閑休于昌胤諒授哲之由天風
昂藏而鵠奮爰秉憲于內臺閭闔肅而風迅按行部以
澄清吏望風而解印遵三巴以激揚指條山而歸覲曰
有子以立朝砥奔流而孤峻德浩蕩以陽敷諒淵迴而

海運制夷貊于鞭筭羗中天而作鎮蔚蘭孫之勇榮憑
桂科以再振辟龍誥之推恩膺崇階之纂慶信五福之
具宜異百齡之方進胡地道之違經豈天心之害順騎
箕尾以歸神嗟遺老之不憇某昔列署于夏曹懼鰥官
以夕競荷司馬之元猷摘戎機而面命緬肯顧以增輝
矧標題之既甚屬子姓于通家聞訃傳以內恟叨簡命
于西藩媿保釐于新政覩凡筵之載設心於邑以如疚
敢剖牲而潔齋跼陳觴以薦敬篆烟裊而氛氲靈彷彿
兮在瞬尚饗

祭趙大洲乃翁文

惟靈蹈誼自躬秉哲由性玄機內朗知常守靜弘藻外
敷琮璫輝映德厚發祥義方養正乃誕國禎丕揚家慶
煥啓人文高驤藝圃健翮風搏鮮英久秀攘袂登壇睥
睨于後矯焉風節明廷敷奏信心自許昌言不疚直道
于今令聞惟舊曰惟公休載胤厥祥恩褒寵荷綸綍斯
皇鼎釜承歡几杖康彊五福攸宜百年未央胡厭世紛
遽歸幽宅庶見素冠我心則慙碧雞萬里蕙帷孔沍金
馬廿年蘭芬久襲情貫哀榮感興今昔短誄中虔椒漿
是瀝尚饗

祭蒲津景老姑丈文

嗚呼傷哉蓋聞氣有淳漓修短是期降福繁殺相德攸
宜抑理可舛將天無知矯矯人龍挺此逸躅冲度雍穆
精金良玉淵量汪洋高山大谷泰和盎然萬彙同畜處
衆懽和在隱不昧當貴益恭守約于泰獎延後學拯拔
顛沛萬木垂陰九族均賴毓氣之淳作德之豐寃詳耳
目遐邇誰同是宜百年閱世五福綏躬茂延天祿永樹
人宗胡貞松勁栢不待秋風地維天柱折此高峯使夫
善人喪氣義士激衷風悲雨泣天地傷心也耶玄輶將
旋里人道惻矧是姻聯奕世載德式莫耐觴情哀氣塞
蘭杜餘芬山河慘色雪涕陳辭納于素軾尚饗

祭陸東湖文代作

惟靈雲川望閬石城間氣纂華曜靈霞蒸雲蔚翊國昌
家文經武緯天挺其奇肆于初載豹韜澤霧鳳文呈彩
入穀斯珍飛聲乃倍皇鑒其休懋于初政未央鎖鑰北
軍號令三錫推恩廿年授柄公殫厥猷翼翼其飲食嘗
投七寢罔安衾徼道周旋為帝腹心公矢厥力鉏姦刈
邪三輔不警七萃無譁閭閻尊嚴為皇爪牙膚功既彰
隆寵是際公孤登崇山河錫誓冊誥光先簪纓延世居
寵恩盈慶高益下孝友內融謙恭外馮允矣先民居然
大雅求德不回疑福方固倚伏難量慶吊相驚越歲之

終忽傳公訃九重震悼卹賻增隆茅土啓邦牢醴從豐
古今際遇恩榮始終卿案盡傷群心若一朋語于朝入
嘆于室餘烈猶存音容莫即玄輅將駕夜臺且扃幽明
永別生死交情公神不返我淚如傾桂醕既清束芻是
設爰申謀告祇薦芳潔靈馭其臨篆烟若結尚饗

祭賈一軒文

嗚呼哀哉公胡歸之遽耶玄堂巋爾西風淒淒公之靈
其在茲耶公有碩德夙培仁厚暨我外翁縉紳耆耆締
社香山彬彬九友竹杖綸巾龐眉皓首維叨偕計獲侍
庭牖荷愛便蕃贈慙瓊玖逮余舅氏分符出守我祖南

還郵亭樽酒淚雨滂沱與公分手曾是倏忽星飛電走
死別生離天長地久嗚呼哀哉客歲方除余車北上再
拜登堂及公無恙惻念往昔痛哭相向載聆公音載瞻
公狀神爽罔充我心寔愴寧慮昕夕期頤是望詎意中
春公奄屬纊也耶嗚呼哀哉公有令嗣違公泰速公有
良配先公棄祿婉婉弱孫衰裳匍匐公宜少留胡不信
宿雨泣風悲傷心慘目嗚呼哀哉維生也後辱在通家
登公之堂音容已邈拜公之墓浙瀝風沙霜露候改生
死途賒悼今念昔有懷如麻敬從舅氏祔薦芳嘉陳辭
有極抱感無涯嗚呼公其聞之否耶哀哉尚饗

祭孟少岩文代作

嗚呼哀哉公真不起耶公德正而方氣粹而昌端居謝
輿于彼湖陽玄首朱華七袞康強方期遐享百年未央
迺嬰未疾遽爾淪亡耶某初觀公惟歲丁酉傾蓋都亭
論心杯酒萍梗西東廿年分手余倦于游公歸已久歲
時晤言竹松賓友重以婚姻歡盟孔厚自辛蕙葭獲托
瓊玖兒女方髫嘉禮未偶公遽長歸不恤于後耶嗚呼
哀哉日月易流三七忽屆庭宇依然音容若在孤弱傍
徨我心增慨泣涕申詞明靈不昧尚饗

祭王海峯文

惟靈倜儻任奇雄特多算持籌一揮黃金聚散居有不
吝臨終靡亂精爽焯然姻黨欽歎日月易流十旬浹旦
臨殯未能懷風興惋束芻遙陳鬱鬯是灌瞻拜徬徨雲
車汗漫尚饗

祭趙公文

嗚呼天道不爽德福攸兼人事多端慶吊相纏于今是
惻自昔則然篤矣惟公勵志初服慕羹適口芸編寓日
中夜有覺環堵無欲宏施未究小試可卜方化絃歌忽
歸林麓三槐植堂一經貽塾鳳毛燁燁桂采揚馨道源
探契公教是弘賢關發迹公志是成外分民社內猷邦

刊循良著蹟平反有聲帝念臣共克勤於位爰降明綸
推恩所自鶴筭方康龍章游被孝子歡心德門增氣凡
我同鄉兩河士類覲榮滂懿嘖嘖稱異作為篇章歌咏
其事謂是純嘏百年可異詎意德星迎秋忽墜悲風自
西傳訃長安賓客在門會見素冠公願則畢子心未殫
扶杖晨奔清霜正寒誼深桑梓情均戚歡束芻可致執
紼則難敬陳牲醑望奠雲端篆烟彷彿山川渺漫尚饗

祭南野馬年伯文

惟公經學起家行誼範俗由躬衍慶自天膺福作善孳
孳惠先鰥獨敷政優優澤餘輦轂息機中歲遂志初服

承親遠田教子啓塾肆惟哲徹漱潤揚馥載筆承明校
書天祿大官養備褒綸恩渥怡志庭幃放情山谷壽筭
彌高神情朗淑期頤可躋觀化何速令子扣閤西奔匍
匐棘人樂樂使我心蹙欣戚情通班行義篤菲儀陳奠
告誄司祝

又

嗚呼惟公關右望閼河山茂族負直蹈方毓和含淑學
不干名仕罔徇祿與物偕春居常自足人戴淳休天降
戾轍哲徹詵詵明時驚鷺多壽綿綿歲寒松竹鸞諧增
榮蘭堦馥馥一世幾人百年全福嗚呼休哉馮翊河中

百里而近越境聞風望廬起敬迨歲癸丑天假其幸獲
與仲子南宮授分脩業同術最彛此行葭玉分暉蓬麻
藉性寒暑載更公車至止修宇冲襟龐眉鯢齒謙光襲
人高論溢耳夙懷所欽躬承厥美有德有儀是父是子
締誼惟篤世好爰申婉婉弱息曰字懿孫姻盟既訂眷
禮彌敦公暨予親頻年在里東西若隣盈盈一水子姓
往來歲時燕喜語笑相聞周旋孔邇今茲春首弱息于
歸太史孝慕言念庭幃天孫司勸終事可幾瞻雲計日
歸心如飛覲省非遙公不少待哀訃東傳陰雲晦藹几
秋永違音容若在孫子悲號見聞興慨嗚呼哀哉公以

厚德享有遐年子榮孫秀閱及曾玄人間事畢拂袖雲
旋固亦稱奇字內方駕列仙者矣第以人事多違子心
難畢將父有懷承歡無日此太史之疚心寄永慕于泉
室重惟息女藐焉弱質閨閣初離第軒遠隔固依歸之
得所亦懷念其如失鄉國天長几遄風瑟來芻申誠清
醑薦茲控辭有窮殷心靡述嗚呼哀哉尚饗

又

嗚呼昔歲丙寅翁歿于里崇祠權厝歷今九祀地靈既
章天寵聿邇至孝感神厚德萃社翁有醇仁曰惟性成
醖耐醞和東風捕鰆在匱能施居有不矜里閭憫家

庭廟雍蓋駐世踰八袞而德之種也則茂衍于千春翁
有餘休源源來逮科名蕙蕪聲光鼎腐秘幄升華儲端
正宋格心惟良眷德斯在華表頒恩諭綸耀采蓋仙遊
未十稔而慶之宣也則間值于千載某年家猶子肺腑
未契欽風自昔投心以世方翁之歿羈宦天際總帳雲
遙瞻望興喟茲翁之殯幸獲臨窆短誄告慶薦芳蕉荔
靈輓玄輶彷彿來蒞尚饗

又代作

惟靈明經力學不顯其光衍為義誨再世而昌箕裘紹
良珪璋競爽嘉彼式穀膺茲祿養懿惟仲子擷秀詞林

馳恩寵錫有煒綸音訓飭于庭志行于國垂白影纓寔
天報德春秋幾何椿堂忽圯知生者吊粵惟古禮爰酌
清醕陳是誅辭素帷咫尺精爽格思尚饗

祭胡北泉文

代作

嗚呼公遽不起耶公以耆碩負望海內受知明主致位
冢宰登明選公伸幽振滯群司庶尹莫不慎評方將允
釐百工穡宣至化天胡奪之速耶念自附驥登庸既歷
三紀風期夙合在久茲親頃歲借公縉雲余叨同事既
投深契燕賴壯猷公旆南征我心則戚公車北上我望
斯紆詎期握手未幾公復舍我去耶嗚呼哀哉公志未

終公年未邁恩重名高心竭形瘁積勞成疾由衰生老
余心適憂之不意奄至此極也聞訃驚心匍匐奔視殯
舍及見呼公不聞四壁闐然棺衾弗具清忠亮節古道
有暉生死交情余心獨苦恩卹既備素襖將揚泣涕臨
風一觴申酌嗚呼與公果永訣矣哀哉尚饗

祭劉年伯文

嗚呼山川匯靈間生才俊外則國珍內寔家慶原本厥
祥積善斯應惟公夫婦夙篤義順鹿門婉德冀野齊敬
宅儉有恒與物無競栗陸淳風葛天真性巨美攸都是
鍾哲胤握瑜懷瑾振綺揚馨蔚兮豹變鰈爾鸞鳴方翬

解賦總明經西山發跡南省登名妙探千古高步群
英赤帷奉使白雲讞刑凡茲顯鑠縉紳共榮曰惟餘慶
是享厥成洞洞其心溫溫其度捐彼外華守此中素在
達忘矜居有不露環堵揮麈方達讓步蘊鹽自安苞苴
不顧詩書自娛窮年罔措凡是淳懿士人爭慕曰惟少
成義方之故既徂斯休宜永厥福鳩杖優游方怡松菊
鶴髮康強行膺命服所期大耋忽焉不祿天奪愛日風
驚靜木嗚呼悲哉念惟令子天成篤孝初聞母疾拜章
請告誠感北闕車驅東道庭闈肆覲几筵興悼萱華既
零橋齡且耄霜露未週再遭不造汾曲風淒燕山訃報

某等分塵兩河聯情梓里結綬京國交驩令子是通戚
欣靡睽遠邇靈不少留朋心如燬瞻望弗及齋咨靡已
清酒一觴白雲千里靈降不違鑒茲短誄尚饗

祭孫文恪公文

惟公之生有炳其神將謂昊天惠此下民引繩正墨作
表人倫蛟翔虎躍高步斯文貞不絕俗和不苟親士林
歸德蒼生繫仁初公之出馳聲紫宸重瞳親拔眷爾經
綸廿年颺歷帝命屢申典邦三禮夙夜惟寅公位雖隆
公施未極將秉國鈞為時益稷覆金有待夢瓊何亟天
不可量民罔攸即斯世之哀匪在一人惟我後學倍有

傷情始釋負擔卽仰公名遠挹風烈私淑典刑繼叨詞
苑獲步公塵逸駕莫攀芳躅是程重以世誼荷教尤渥
經彼犬獸示我先覺鳳毛振藻嶄嶄頭角才寔國楨德
由家學肆我同志親仁訂約此日是競他山可琢有來
必受無言不確厥益方求其聚斯樂胡歲屆秋邁茲大
苦袞裳匍匐南奔江滸芝蘭不聞茅塞且覩悼往傷離
有淚如雨嗚呼公雖歿矣德聲並重忠父之子孝伯之
仲瓊枝猗美森森麟鳳帝念豐功推恩起衆閭閻榮暉
胡然余痛道義情深存亡感切霜露天遙几筵風烈椒
漿既奠蘭芬載藝長跪陳詞寸心若結尚饗

祭徐年伯文

嗟一氣之蘊化良雜沓而靡專匪盛衰兮互倚將禍福
兮糾纏謂台考之必仁兮胡哲人磊磊而弗克以永年
緬惟翁之降神匪箕汾之靈異幼徇齊而肯堂挾桑蓬
而遠至泛浩波于江湘眇昆陵而繼志萃玫瑰于萬鑑
奕千楹之鼎植篤孔懷之至恩躡姜田之懿致眷隆德
之胤芳茂庭闈之瑤珥伯鏗鎬以金鳴排帝閭而獻記
仲婉孌以玉立濬天潢而締誼冀鶴算之隆躋沐龍章
之寵被寧几杖之未閑指崦嵫而返轡靈漠漠以何之
訃遥遥而南至吁嗟悲哉陰雲慘兮迷泉臺西風瑟瑟兮

傳
總帳開音容阻兮子心摧淚相將兮吊者哀其等叨同
升于冢嗣聯欣戚于通家憶玄輅于江表寄涕泗于長
霞清醕載陳有牲孔嘉篆烟濃合髣髴雲車嗚呼哀哉
尚饗

祭北渠如公文

惟公淳龐賦質樂易成性科第起家循良從政居衆能
謙與物無競里閭歸仁林泉稱盛玄首童顏百年未竟
胡歲之春遽聞治命其等叨隨杖屨竊仰德華入室惟
蘭倚玉者葭卉木變蕃音容已遐撫時憶德有懷如麻
束帛陳虔椒漿薦嘉篆烟蒼蔚彷彿靈車尚饗

祭湖庄任公文

惟翁上古遺民當今大莖完璞靡雕貞素未涅葆是天
倪篤生人傑起家科第報國忠節銛金擬斷瑩冰比潔
駿績告成鸞章寵揭迢迢關塞表表風烈庭訓載揚親
心孔悅既壽且康曾玄正閱百年未央五福是擷胡厭
人間遽聞永訣藩伯于奔匍匐哀經爰啓東阡生氣惟
結既蠲穀旦將駕玄轍合志交深通家義切短誄申誠
東蜀是設臨風荐觴九京可徹尚饗

祭敬軒夫子文

嗚呼惟公契道以心體道以身斥遠異說不作空言正

學一脉昭代一人朝著表儀學者準繩頑夫薰德穉子
聞名皇運聿昌僉論載明特表真儒從祀孔庭一時曠
典萬世公心某州里小子百年後生仰止每懷寡過未
能讀書有錄示我規箴遵彼汾曲修謁祠宮琴鳥瞻德
黍稷薦馨流風穆若山高水清尚饗

祭槐室王翁文

嗚呼客歲之冬余車北上翁時卧疾憑牖相向叙舊紹
連念別惻愴神爽猶昔謂翁無恙胡厭塵寰遽遊泮曠
嗚呼人世首福曰惟壽耳既豫且康所貴有子翁登耄
壽黃髮鯢齒膏香胤秀科名濟美鸞文寵褒荷衣易紫

几杖優游歲時燕喜生人所願亦既備止其初有識翁
方壯年偉標玉立雄辯湧泉比其從宦廿載游燕頃嘗
予告獲返郊廛陵谷變改故舊鮮全惟公在矣靈光歸
焉揖讓有容坐談疊疊感念今昔我心如燬睽隔無幾
言猶在耳死別生離千秋萬祀惟翁仲氏天官之彥會
見素冠群情興惋故園嫺友天涯繾綣絮酒東窗臨風
肆奠神無不之几筵如見尚饗

祭南澗公文

代作

惟公降靈河嶽受精列宿勲茂疆場名存宇宙碩誼宏
猷罄竹以書其猶未究也憶昔秉節荆南旬宣是覃威

將風蕭惠與春涵草榮衡霍魚躍湘潭愛遺豐碑廿載
街談此則一時偉績炯炯素諳者也迨公釋鉞居廬懸
車故墅風月琴書歲時父老地維失經入妖載誘卽是
底囊靖茲亂首此則百年晚節嘖嘖人口者也風雨淒
其歲華云暮哲人何歸駕彼玄輅朝喪耆勲鄉亡元鑊
遠近有識涕泣相遇某楚南後學久庇公芳河東新命
叨守公鄉感今念昔懷德悼亡載陳牲粢清醑在觴披
衷申誅辭短情長尚饗

祭外祖文代作

惟公德凝金玉氣邁風雲周旋矩矱談吐丘墳令德聿

彰介福是荷爰有賢嗣蜚英青瑣鶴髮徜徉龍章寵被
蘭砌舒芬百祿懋備杖屨康強優游泉壑奄爾乘箕遊
神廣漠其叨佐郡欣覩德星惠言式我炳若丹青庭宇
靡更音容長逝風日含淒河山泣涕殺牲既具清醕孔
時玄臺有覺赫赫臨茲尚饗

祭翁東涯文代作

嗚呼公真不起耶公在朝廷祥雲景星廟廊柱石縉紳
典刑公在邊輔赫赫如彪虎天子長城蒸黎父母故鼎彝
銘其勲烈日月對其精誠海內想其丰采羗夷問其姓
名若其行止也則斯民視之以為忻戚而其存歿也寔

天下由之以為重輕中外方喁喁然日夕冀公之出而
詎知公無復意于蒼生駭駕列星回翔九京神龍遁迹
寶劔還精九重震悼朝野沾纓某等聯袂登庸叨隨驥
足三十年来榮分倚玉諒祀國之內懷冀方舟之共勗
天意胡為公歸胡促梁壞山頽我心惟谷帝念元忠
卹孔隆司空卜兆太史銘功於惟公之休烈殆善始而
令終第念鈞天之失倚兮固使人抱恨於無窮憶昔傷
今緘辭告誅為天下而興悲併私衷之無已英爽靡忒
髣髴歆止

祭郭丹泉文

維太行之勛華兮匪靈異于中州鍾德門以衍慶兮寔
蔚蔚而好仇肆哲人之挺生兮舉杜若于芳洲嗣書香
而振袂兮翔六翮于龍樓偉棠棣之芳華兮紛鑒鍊與
琳瑯翊槐卿於粉署兮宣三輔之宏猷肅金憲于梁豫
兮敷政化之優游惟中外與崇庠兮信歷途之異致秉
忠淵而清穆兮固守道之不二望方茂于岩廊兮倏龍
蛇而兆異乘箕尾而上征兮豈玉樓之是記悼鄉土之
失賢兮心於邑而增傷謂天道之有知兮胡哲人之不
長敢剗牲而虔薦兮陳桂酒與椒漿馳寸衷于千里兮
固辭短而情長

祭郭公文

惟公毓瑞燕山揚芬馥甸妙懽永融橫秋鶚薦墨綬承
流黃堂佑善寵渥汪洋聲華赫燿授綬清時丘園是戀
一經教子藝林再擅桂籍紹芳楸江分宴持節秉輶承
綸三殿恩褒匪遙驚章且絢詎意茲辰龍蛇告變家失
嚴君邦亡哲彥某等叨隨令子聯名登選安定門墻分
投繯繼義共彈冠感深拭面丹旄既揚剗牲告薦陟降
有靈鑒茲芳奠

祭張蒲川乃兄文

嗚呼公世吾蒲也去鄉蓋二千餘里而家于是某輩與

公弟蒲川君又咸有籍于朝而宦于是輦轂奧區五方
鱗萃而唯同鄉井者其情獨洽焉凡有吉凶欣戚同之
唯公孝友勤慎以怡親而理家俾蒲川君得以悉心王
事安享天倫之樂者余輩所同欣也今也百年未半溘
然觀化親壽且高家政且殷而貽蒲川君以孤立之苦
情何堪耶玄輻既乘幽明永隔東蜀陳薦用寓所同戚
焉伏惟尚饗

祭張永石公文

嗚呼惟公胡歸之遽世方嚮公公未宜去鋒車告旋玄
輻忽馭當宁興惻群生失豫嗚呼悲哉公有宏度汪汪

不測公有冲襟熙熙可即不忮不求靡疆靡域洪鈞播
春物態生色舉自蚤歲奮迹賢科踐颺中外跋履山河
險艱備歷勞勩居多休聞正赫玄髮未皤昔歲方春公
車南驚簡命是膺用督邦賦樽酒都門踟躇四顧故國
交情天涯別趣迨歲之秋帝召公歸予工載若四民時
依人心允洽我願不違紆思日月企注德暉行道遲遲
歲聿云暮未見君子憂心匪互悠悠蒼天善人弗祚有
來自南忽聞公訃嗚呼哀哉脩短有數視氣澆淳公神
不二既頌且豐禍福有應視履降祥公德不泯終焉允
臧豈不耆耄斯此中壽豈不鈞軸尼茲中路我儀圖之

莫知其故事有偶然時有適遇帝念忠勤褒卹孔異司
空營城王人論祭正治登階常伯晉位生死恩隆哀榮
禮備驚文既錫馬鬣且封掛劍在念執紼靡從辦香絮
酒遠道深衷陳辭有極寫恨無窮尚饗

祭坡翁文

嗚呼翁遽不起耶翁降神自天惇龐耒艾輸庸在國民
望方切海內喁喁然待命于翁詎意翁乃無意于斯世
耶嗚呼痛哉客歲翁請告西旋親姻咸訝錦車入里獲
親光儀神志充揚音談洪暢衆方歡然相慰祝慶百年
而豈謂新茲週歲耶頃者秋半候翁于堂道舊話東坐

語移容神情風度不異平日曾未逾旬而翁棄人間事
矣悲哉悲哉時序易邁五七奄臨咳唾如聞德容日遠
九京莫作百感攢心謹用牲齊薦鮓椒醑惟翁英爽在
天亦緬念故舊為一鑒几筵也耶嗚呼哀哉尚饗

祭韓老先生文代作

惟靈抱朴河干葛天寄傲訃著青編恩承鸞誥蘭桂春
榮松筠晚操五福駢臻昊天垂報冀黃耆以無疆忽緇
韜以遄導諒觀化之有終返琬璞於玄造某叨佐石邦
景思芳躅藐遺跡之莫攀陳生芻之一束桂酒兮椒漿
告我虔兮薦此芳薌風習習兮雲涼水泠泠兮山蒼靈

兮降兮儼中堂篆烟霏兮心彷徨尚饗

祭乾庵馬公文

嗚呼公胡遽至是耶公有宏雅之猷而未竟其用公有
惇仁之度而未究其施帝心之倚注方切百辟之儀刑
是資而詎知公無復意於斯時耶嗚呼悲哉公得天之
茂神英氣厚完粹淳龐終鮮疾疚曾是迎秋微疴是邁
方計日而俟平謂松筠之必壽廼玄冥之戒寒忽山頽
而梁覆嗚呼哀哉其本孱闇夙公是欽亦既傾蓋謬許
同心繼語默之相契忘形骸以至今中聯姻婭世好攸
尋豈兒女之是托惟兄弟之誼深羗人事之多端屬熙

陽而集霰在月之朔息女既違侍于滌滌甫及越旬公
復坐兩楹而夢奠日月幾何憂欣驟變兼公感與私傷
腸一日而九轉儼總幄之高張憶德音而不見嗚呼痛
哉薄陳牲醴哀薦几筵交情生死有懷萬千陳詞不罄
隕涕如泉嗚呼哀哉尚饗

祭高曾以上諸宗祖文

嗚呼惟我宗祖世有潛德積累百年逮于末裔是階科
第荐陟崇華揆本溯源寧忘所自蒙恩賜告獲奉丘隴
寒暄變節雨露既濡是用刲牲恭脩祀事伏惟尊靈昭
垂鑒佑啓此顓陋不隕厥聞上荅國恩下延家慶以闔

塋諸從宗祖伯叔考妣配尚饗

祭母文

嗚呼痛哉今日吾母之壽辰也兒自壬子稱觴旋即北
上祇奉慈教獲第春官羈宦藝垣未能歸覲每當是日
西望神飛自謂母壽未涯舞班有日晝思夜念夢繞萱
堂豈憶大變卒臨至於此極耶痛哉痛哉音容長往茲
已二年時屆茲辰悽愴如昨几筵徒設咳唾不聞叩天
無門拊心何及謹同弟輩哀薦牲齊此日傷心終古抱
慟嗚呼悲哉尚饗

禪除祭母文

嗚呼歲序遄遷奄及禫除回憶始變如更朝暮時物當
新音容永隔嗚呼悲哉丙辰聞訃三日成服緣經初嬰
疚焉心割今當易吉悲感復新嗚呼傷哉生死修短生
人大較世代相易萬古一揆念惟吾母劬勤立家不享
厥逸仁孝種德不食厥報使兒輩不盡之心無已之恨
何所極耶人之生世百年為永使死而有知尚當事母
於地下如輪迴之說不誣異世願為母子如其隨化徂
滅徒有悠悠之恨寄在終天耳嗚呼痛哉敬用牲帛醴
齊哀薦禫事伏惟尚饗

捧誥祭祖考妣文

惟歲癸酉今天子登極覃恩以長孫某有列在朝追贈
顯祖考守正府君為通議大夫吏部左侍郎兼翰林院
學士前祖妣王氏顯祖妣解氏俱為淑人茲者祇奉制
書告薦瑩壠風木蕭森音容不待絲綸焜煥下賁重泉
感愴榮光不勝攀慕神主既易伏惟尊靈是依永綏孝
享

捧誥祭顯妣文

惟往歲癸酉屬今天子登極覃恩加贈顯妣為淑人鸞
書褒進視昔有加松檟生輝嫺戚欣豔念惟我母往值
家艱奉姑孝誠持家勤儉子育既衆筋力瘁殫訓戒丁

寧親授章句維祗奉慈訓竊祿于朝仰藉慶澤荐躋通
顯曾不得奉一日之養抱恨終身天道不僭貶命三膺
追憶音容日荒月遠哀榮在念痛悼無極謹用牲醴蔬
果告薦瑩域神主既易仰惟尊靈是憑是依永綏孝享
謹告

胡母百日祭文

嗚呼時月遄易涉秋及冬計母之歿已及百日念父違
養四序且週冰霜戒寒音容日遠感今憶昔哀慕何禁
牲醴載陳陟降若覩嗚呼慟哉

啓攢祭父文

嗚呼慟哉吾父棄養奄忽逾年陟降戶庭朝夕如見茲
者奉天營兆安厝有期爰卜吉辰殯堂預啟伏惟尊靈
依憑孫子不震不驚升輶非遙瞻憶永隔傷今念昔百
千增感嗚呼慟哉尚饗

又

嗚呼慟哉方昨歲春杪吾父之棄我諸孤也兒維遠在
京都隔關二千餘里兒端病卧床簣懣無知覺于時惟
兒教等及孫輩侍棺殮耳及維奔歸端病可則殯宮久
已固甃今且匝期始獲叩棺乃教復不待矣悲哉慟哉
几筵在庭冠裳在座晨昏瞻拜尚如定省茲者塋柳既

歸引紼有期雖泉壤承恩榮哀備典乃杖屨益遠音容
永隔中心彷徨惄如新別悲哉慟哉殯堂初啓深懼震
驚薄具牲齊祇申奠告仰希尊靈依憑孫子安饗苾芬
尚饗

祖塋告文

歲在丁巳肇建祖塋孫母王氏隨塋在斯茲奉明恩勅
塋孫父窆封在邇母柩當遷謹具牲醪代陳辭告卜塋
伊邇松楸相望我祖有靈所覲歆鑒尚饗

將塋祭父母文

吉壤既修輜車既飭諏茲良月奉柩即安緬念顯妣昔

塋祖塋迨迄于今三十年所茲將合祔共沐皇恩期日
屆臨几筵且撤音徽益邈幽明永隔俯仰庭周傷心如
割敬陳牲醴祇申薦告哀哀父母鑒此悃誠嗚呼慟哉

塋畢祭文

父母來茲亦既三日爰從吉卜奉柩就封穆穆玄堂勅
所營構群神是衛百祉攸綏父母歸焉廸知安吉神主
既設尊靈具依敢用牲羞祇申薦告崇丘可望衣冠永
藏斯是慟傷潛焉局已尚饗

卒哭祭文

宅兆既封靈龕來復彷徨夙夜徙倚庭幃哀慕不寧瞻

戀弗及載值剛辰祇告成事禮制有限子心靡極遽豆
惟馨父母孔邇安此故宇孫子具依

小祥祭文

嗚呼歲序流易何其迅耶去歲明發吾父違養寢興哀
慕猶如旦夕詎知寒暑周廻已及小祥耶瑩兆既封神
主在座晨昏灌獻瞻戀弗及時物不殊中庭寂闐出入
惻愴舉目傷心謹備牲齊先期薦告奉誥贈一品夫人
顯妣王氏顯妣孺人胡氏配

祭父文

嗚呼痛念來日吾父之壽辰也兒維違遠膝下倏經十

春每遇茲日不獲同孫子稱觴親賓歡宴馳儀獻壽增
戀白雲自惟几杖康強松筠正茂百年可待祝願方遙
豈期吾父奄棄諸孤若是遽耶去歲茲辰父歿十日兒
維在都尚未聞訃凌晨南拜怒馬內傷不及三朝凶聞
奄至風悲日慘天地無色尚忍言耶今又期年新封恩
兆音容益邈庭宇寂然觸目驚心人事頓改遇茲慶旦
翻助悲傷謹用牲齊仰申薦告日月易邁哀慕無極嗚
呼慟哉

修麓堂集卷之三十二

祭文二

祭白仰庵乃堂文

惟靈溫惠自成篤生令子華腴衍慶惟德之似曰惟白
氏延陵巨室康敏啓祥中丞嗣出符卿振頴奕世陰騭
閎閎焜煌故家鮮匹于今續休厥惟邦彥居有能謙樂
善不倦詩書漱潤黃甲登薦箕裘紹美儀章簡練玉瑩
無瑕錦文有絢白氏之昌王國之厚爰揆所自誕惟賢
母合浦韞珠藍田育玖蘭茝蘂芳荻筆善誘既胤宏休
亦食豐報昂養方新鸞章寵耀百歲為期多福永蹈玄

首未華蒼昊不吊芳萱告秋寶婺失曜氣慘北堂惻傳
行道矧我同方義均休戚總惓忽陳中心如怒南瞻江
渚雲天遼遼追悼淑哲音容間寂凌風薦誅椒漿是瀝
靈座依然雲輶胡適尚饗

祭嚴母文代作

嗚呼熙運在邦篤生碩輔風虎雲龍明徵自古昌慶在
家相惟淑哲德嫺福併圖史垂烈孰宰其端莫測其然
間值者氣陰隲者天展矣夫人握貞含粹神定厥祥元
臣作配唯是元臣天牖其聰昭融顯契沕穆幽通斟量
玄化鼓鑄群工三光順軌萬國米同興殷伊傳佐舜舜

龍化昭中日世因春風越惟夫人克相其隆衿褕告慎
榛栗修共琴瑟靜好環珮從容勤惟夙夜井臼躬儉
以終始綺縠裁豐明章內則有煒管彤惟是元臣天降
之吉求福不回基命孔密甘盤純祐畢公亮弼岡陵並
算松筠比質黃扉四紀丹宸一日三錫滋蕃百祿駢集
越惟夫人戩穀是匹峻節高標壺儀特立禕翟其華魚
軒有熠班衣娛情蘭孫逸膝金紫滿堂笑言盈室閱世
滋長生人願畢廼駕青禽廼駉玄鶴高謝人間遠遊碧
落帝念柔嘉渙頒寵渥將作供殯奉常奠爵王人護輿
司空營廓高朗令終古今孰若某叢蓂小材卑棲弱羽

哲匠罔捐至和並煦大造難名精心自語叨厠華階符
節之府獲從長公朝夕步武仰慶隆禧歲時屢睹春滿
天街日遲萱圃曾是倏忽靈筵在戶悼徃懷仁有淚如
雨敬致束芻載醑清酤短誄申虔玄輶肯顧尚饗

又代作

於惟夫人黃輿間氣彤管遺烈握秀珪璋襲芳闕閼天
定厥祥于歸師保德婉柔嘉福偕壽考室家之好人道
大端婦順末章交愛則難於惟夫人壺儀是安承先薦
藻約已紉蘭焚膏夜織舉案晨餐靜好琴瑟和鳴鳳鸞
四德具備百年永歡人之大祿曰貴而壽得一為奇時

臻蕙茂於惟夫人獨稟其厚翟第魚軒紆玉拖繡春滿
萱堦光分婺宿一品殊榮八齡景佑洪慶純釐造物有
藩既備于身或靳于昆於惟夫人澤衍益蕃亦既令子
有奕其孫濬汾仙源聯籍帝閣晨昏定省歲時笑言潘
輿游衍萊綵翩翩眼中三世海內一門箕疇五福歸于
考終克綏惟始斯世所同於惟夫人高朗有融含飴康
樂鳩杖從容人間事畢回旆閭風百司趨唁五位興恂
恩綸諭祀廼命秩宗豐山開城爰詔司空褒卹孔碩賻
賜增隆生也猷穀歿也哀榮几筵隱跡圖史垂名某等
桑梓後人絲蘿末契叨從太師恭承嘉惠嗣好司空締

誼以世既挹休則夙欽淑慝沐寵知榮懷仁罔替不謂
仙輶曉此雲遊凄芳愴心潛焉出涕故國天涯靈輦河
澨白露沾濡丹旌摇曳敬握束帛於粲丹荔攀軾誅言
臨風祖祭傷如之何魂兮來蒞尚饗

祭茹母文代作

惟靈貞淑毓性肇自坤維婉孌成訓式閑姆儀婦順既
章母則攸茂圖史丹青閭閻領袖念惟夫子矯矯人傑
挺生南紀壯遊北闕百里分符四知勵節曰惟孺人克
和其烈井臼親操冰蘖競潔偕老是期訣于中道皦日
盟心栢舟失操抱哺其孤遺經作教賢嗣振穎天路橫

翔金坡踐美蘭署分香冲標和物蕙蔭芬芳逸韻離塵
玉佩鏘洋考帝之室惟材之良曰惟孺人克衍其祥迺
子東征介福北堂列鼎蕙蕤舞彩焜煌引年彌劬愛日
方長不謂迎秋西風送悼寶婺戢輝萱華殞耀立孤成
名委和歸報古有令模于今是蹈其等叨同令子宦遊
燕市投分金蘭聯情桑梓道術琢磨飲食燕喜獲聆淑
聞中心是企欣瞻景祿方升未已曾是倏忽音容不起
莫覩翟裱傷心素几故園天遥并江萬里靈輜風淒征
途方始挹縈行潦采芳沼沚薦忱蔬奠告哀短誄陟降
可即篆烟孔邇尚饗

祭王母文

惟靈緯秀發精含章坤厚茂閎承暉名德作耦虔薦栗
榛勤施并白式樹母則克昌夫後一膜隔恩物情固有
冬絮晨霜其來已久悼矣淑靈獨超其右哺饑燠寒提
携捧負鳩儀均施熊丸善誘婦有慈姑子獲令母雙鳳
翩翩高翔帝牖伯氏宣勞竹符是剖叔氏贊慮楓墀司
糾玉府珪璋清廟俎豆帝謂叔氏代予西狩風清汾曲
氣凌霍阜屏竄豺狼冀除稂莠吏奉典刑民歌畎畝繡
裳東歸將母恐後瞻彼白雲為此春酒慶也幾時哀來
與偶子心未央天關難叩凡我晉士沐德孔茂感均桑

梓莫酬瓊玖會見素冠憂心若咎效敬束芻薦誠用缶
春日東望驚飈着柳賢閭迢迢高天引首靈爽如存暨
茲清卣尚饗

祭裴母文代作

惟靈淑慎相閭婦順是弘慈明演訓母則攸崇長發休
祥炳輝元胤南省翔鸞中臺展駁秉憲貞文分藩督儲
旬宣江漢丕變青徐鼎養殷隆綸褒赫郁坤輓忽驚發
辰殞煜某投誼哲嗣援好喬門哀榮骨肉異姓同恩玄
輶既乘剗牲式薦短誄告哀涕淚如霰尚饗

代家君祭五外祖母文

嗚呼情有至戚數有適然辭不及陳湧涕如泉謂天禍
福淫刑德賞昔意其然今見其爽念惟季母種德孔阜
孝敬慈仁休譽終茂惟父專符惟舅表靈惟君典誥惟
胤元名河山閱閱奕禱家聲然而幼秉敏慧壯持門戶
居艱立孤勞心焦腑名享其榮身嘗其辛憂勤既往泰
豫方增二難承芳金輝玉映天達橫騫家殖滋盛昆弟
孝友甥姒惠和藹藹庭闈百順是荷昊天大憯降是荼
苦雷走山轟莫知控語某屬諸婿夙挹德音暨我淑配
承寵良深曾是閨哲同德均患憶昔傷今中心如剗靈
舉將駕悲不忍看陳姓告酹雨淚沈瀾嗚呼哀哉尚饗

同年祭五外祖母文

於惟伯母秉惠結縭服貞永繁仁承菽水澤衍興藩式
是井臼是曰元婦栢舟矢志霜雪凌堅荻管示程義方
載傳往哲與偶是曰元母相是昆季授業孔嘉俾司家
紀俾煥國華漱潤數腴席珍握瑜思軼騷雅道寃墳謨
規行繩迪蔚爾元儒獨鶚橫秋六翮迥殊踰踰矜佩競
避前驅科第名高文章價重曲江虛席游看翥鳳綸封
伊邇鼎食且供五福具宜百年是頌婺耀方輝淒飈忽
動地厚天高降茲荼痛某等叨隨令子鄉書旅薦倚玉
借寵登龍副願高堂令儀景風興羨通家世好欣戚繼

縉鶴馭胡歸生芻在莫芬苾既陳音容如見橫涕申辭
河山瞑眩尚饗

祭楊母文

嗚呼仁賢間生有闢天造邦家攸賴群生惟嚮巨美所
鍾深仁是報厚本敷英豐膏吐耀赫矣夫人允哉斯道
爰滌厥懿夙成令問榛栗告虔蘋蘩薦敬思齊母則明
章婦順猗與休哉惟德之盛潛發厥祥琬琰珪璋庭闈
集瑞門楣承光越有元孫矯首雲驤春宮寵渥夏府紀
綱六軍易聽百辟推芳曾孫王立文武焜煌猗歟休哉
惟慶之長君子偕老子婦承歡黃髮兒齒嚮誥魚駢變

嬖嬰稚內外曾玄牽衣嬉笑歲時膝前九畹蘭滋百歲
萱妍猗與休哉惟福之全天祿具膺人間事畢駢駕青
鸞遨遊西極返璞于天餘澤于後百男競美千年未究
是曰國禧寧惟家祐某瓊琚仰德久挹淑良蘿繚締好
叨附嫔行韶儀不作德音可忘玄宮既啓丹旒載揚攀
惟念切執紼情傷風霜栗烈雲天渺茫有牲在筵有醑
在觴跼莫陳辭篆烟彷徨尚饗

祭梁祖母文

嗚呼福有特隆情有獨鍾究否通之極致哀人世之難
同若夫人者毓黃輿之淳淑纂彤管之休風相中饋于

蘋藻衍餘慶于蘭蕙閱孫枝之擢穎屬耳目之方聰葆
一貞而無息享五福而咸豐人間事畢反駕閭風可謂
百年多祉懿始令終胡訃音之北達廼使余侘傺而傷
衷夫人有孫曰乾吉寔與余輩旅進于南宮肆肄業于
東觀覲砥礪于顓蒙惟意氣之懸乎固欣戚以相通強
與維既不獲將毋兮功又悲椿庭之夙空歆乾吉之重
慶信申錫之獨崇附子姓以稱觴獻遐壽于蘋蒿曾日
月之幾何聞若堂之有封諒修短以同化矣吊慶之相
重惟風木之遺悲纏天地而無窮望恒嶽兮青松汧易
水兮丹楓羗咫尺兮玄宮願執紼兮靡從陳束芻兮我

心恫涕潸潸兮霜露濃尚饗

祭劉紫岩夫人文

嗚呼熙運之昌寔生俊良蛟翔虎躍蔚為國章鉅慶所鍾相惟淑哲天作之合式成家烈邈矣文安降神惟嶽希世璆琳明時鸞駕牛渚問津鵜膏瑩鐸武庫不窮大雅斯作於惟夫人婉德孔焯鳴鳳叶占采蘋示恪問寢候雞承顏感鵲當美不居處豐能約冀野有則鴻先是若文安振藻厲于天達鳴臚玉陛載筆彤墀白虎校讐丹鳳論思樞機參贊豐鎬保釐都矣夫人景祿與綏綵誥霞煥珠珥星垂大官供膳寵渥盤匱上方賜錦恩光

綵絲百年偕老五福攸宜婦德既閑母儀益茂纂組訓
恭詩書啓秀恩浹臧獲氣融先後越有鳳毛穎拔文囿
寵命惟新冠裳續舊桂馥芳春萱榮長晝南山未量西
風胡驟白首同歸豐碑雙鏤司空授城王人致耐存歿
恩輝于今鮮又某等仰止文安高山莫企締好春卿流
風可擬澤浥河汾情深桑梓沃繹徽音忻瞻昌祉霜露
既新音容不起眺望鄉雲淒涼靈几東翊可致桂漿載
酌鶴馭匪遐鑒茲短詠尚饗

又

淑哲降坤婉孌載性秉德一貞集禧百順爰自初筭風

成令問清芬蘭敷溫儀玉映嘉耦自天哲人是儋敬共
舅姑以相夫子中饋滌澣先晨簪珥昧旦警雞春泉薦
鯉嫺協周親風穆娣姒乃眷哲人克成厥美逸駕絕塵
大圭罔斲揚藻玉庭沃心帝幄文昌載陟嘉績孔卓錦
詒推恩翟第承渥壽齊几杖慶衍鸞鷟五福具膺百年
偕老王人諭祭司空授兆松楸留暉泉臺閔曉總帳天
遙太行雲杳式陳生芻寄虔澗藻尚饗

祭劉夫人文

代作

惟靈系胤昌閔婉德代英夙閑姆訓永樹壺程孝穆上
孚惠慈下流姻黨外睦衿襦內修夫子志學我相其勤

井曰先晨燈火宵分夫子清修我相其儉饗醴裁豐綺
紈黠艷蔚蔚人龍亶無內顧霞煥雲蒸馳光天路玉署
聲華縉雲勲烈帝省閑休爰旌淑哲絃瑱陸離翟菲晻
藹既命益恭居有不忝夫人蹈儀衆婦稟則大家作誠
女史承式蘋藻餘風河山右族敢謂絲蘿附于喬木乃
予季弟締好德門春卿之子夫人之孫惟此春卿載衍
厥祥擢秀桂林毓寶崑崗惠而好我延誼于世松筠有
盟金石相勵祿養方新憂來已遽青女司晨纖阿返御
子心傷悲帝關載叩鸞轡同封龍文賜酎餘恩既渥微
容莫起日月幾何雲山千里有懷芹獻敬奠椒漿雲輶

倏忽篆烟彷徨尚饗

祭郝母文

惟靈毓氣之冲昃德之共衍慶之遠獲福之豐黃興淑
造彤管貞風固已中饋允宜里閭稱隆令聞有煒哲範
無窮者矣賢嗣俟俟休有譽慶茲筆承訓桂宮高舉鸞
鵠風標珪璋襟宇價重驂騑聲馳簪組乃相東曹銓衡
之府翼翼在公克承其矩孜孜將事克理其緒丕績則
多元卿是許都矣孺人眉壽斯覩載彼板輿享茲鼎釜
白首滋康班衣屢舞是謂生人至樂昊天篤祐既適既
愉將百年可數也胡萱室方春一夕風雨奄駕青禽西

遊玄圃蓼莪感劬陟屺思怙慈容不作子心惟苦某等
百年桑梓里居相連同朝蘭桂式序官聯哀榮異感休
戚相牽素帷咫尺雲日淒然丹旄千里山川渺漫敬挹
盞藻祖薦几筵洋洋靈馭霏霏鑪烟陟降可即短誄告
虔尚饗

祭閔母文

嗚呼國有仁賢降命自天慶源所匯有開必先深山豐
澤神物生焉穆矣夫人令問夙宣昧旦警雞琴瑟靜娟
乃佑哲人雲路橫騫葆和衍祥篤生人傑藎筆傳經熊
丸訓節道岸先登賢關高揭中外紀綱古今風烈翊道

韓歐矢謨稷契五教攸弼八座載列都矣夫人百年是
閱鶴筭無疆龍文有茁朝露忽零萱榮告折驂駕青鸞
崦嵫返轍某等西晉卹生株守章句多岐靡適長窠未
寤師明振鐸示我矩度品題借榮千金一顧俾二三子
不迷趨步束身道術結軌天路造就恩深依歸義固北
堂長慶同歡朝暮西風送戚永言哀慕憶昔軻母三遷
教殷煌煌仁義綱領斯文一時髦士及門共聞自齊歸
塋從者如雲或敦匠事式贊厥勤某等義同在昔感切
由衷職守有局杖屨靡從雲山迢遙瞻望天空几筵黯
淡薦耐情忡短誄可極寸心無窮靈之格兮肅乎其風

尚饗

祭郝母文

嗚呼天道茫茫禍福靡詳人事反覆慶吊相將胡夫人之奄背廼使余悄矣而增傷夫人含淳毓粹履和蹈方母儀聿茂婦順明章雜佩贈德家用滋康一經授業世用滋昌茲閭人所同識共山河而頡頏者也哲胤揚休天署翱翔東征逐子祿養康彊榮重東曹歡承北堂將謂神恭凝吉德厚近祥童顏難老鶴筭未央而浮雲多變逝水靡常發侵曙而掩暝管近秋而殞芳俾夫綵衣弗御竹杖纒裳鼎釜不設几筵是張脊薊門兮天未指

故國兮彷徨扶靈輦兮千里陟山高兮水長念竭來于
修道兮感悲歡之難量某等式聯姻好久詣德光叨從
王事同游帝鄉念將母之不獲詠蓼莪而涕滂觀夫人
之榮壽若人天之異方及茲變故倍切衷腸採蘋肆薦
醑桂陳觴黃泉永隔丹旄且揚心之悲矣曷惟其忘尚
饗

祭蘇母文代作

嗚呼情有特鍾數有適然詞不及陳涌淚如泉積善餘
慶古語則有昔謂其然今見其否念惟夫人淑慝秉德
婦順既明母儀可則越有元胤為楨于國諤諤東臺邦

之司直亦既寵榮恩頒命勅有煇翟弗載陳鼎食五福
攸宜百年未極慶吊相將天不可測青鳥西飛委和何
極嗚呼傷哉念我孱庸協恭令子九重翊衛六軍綱紀
倚玉有緣同舟獲濟眷言金石誓心終始胡歲之陽訃
音來止緣杖西奔迢迢千里夙願何期中道廼爾嗚呼
傷哉宇宙無窮人生幾何四海至廣知心無多芝蘭遠
矣于彼岷峨鄙吝且萌無所切磨爰以蓬麻同戚蓼莪
束芻肆薦出涕滂沱嗚呼哀哉尚饗

祭姜母文

惟靈胚休坤極葆和含淑婦道母儀廼罔不穀世降淳

風恩分一膜冬絮貽寒晨霜肆雪於惟孺人慈良孔焯
異體同仁孰豐孰約載燠其寒載哺其饑有男我婚有
女我歸家道之索曰由婦人同行異志外內携心於惟
孺人柔惠且溫承姑以順撫婦以仁娉媵繼德戒獲懷
恩里化美俗庭無間言中子惟善夙承內訓黃甲蜚英
瀛洲登俊迎養周京晨昏省覲肆我同方屬辭獻慶曾
是倏忽禍福相競賀客在門吊來與併玄馭胡歸我心
則恟嗚呼孺人樹德不為不茂六十登齡不為不壽善
積生前慶餘身後桂茁蘭芽于今誰又生順沒榮夫復
奚疚第念令子斬焉在憂師惜道南友失良儔龍章且

下母不少留昔之來也菲幄歲隄今之歸也素輦總惟
扶櫬迢迢言遵江滸悼徃傷離有淚如雨祇薦芳嘉陳
茲簋簋穆穆淑靈陟降在戶尚饗

祭胡年伯母文

嗚呼古稱女德閭外靡紀樛木興詠廼托風始相惟母
烈邀紹厥美作範重閭增芳圖史淑惠召和宣慈衍慶
厥宗既亢有室斯競鸞掖蜚聲龍章錫命護圃春蓬孫
枝日盛逐子北征大官分肯逾七望八黃髮兒齒閱及
曾孫瑤環瑜珥亦既壽康亦既燕喜人事多端倚伏難
料東觀十年季長不調江海一麾懷湘投吊適與行會

葵暉戢耀太史承顏永懷愛日孝養備隆深願未畢晨
露忽驚夕心孔惕方擬陳情乃遭斯棘某等叨隨太史
同升共局術業合方契分最篤感母壽榮稱慶相屬日
月幾何繼歌以哭嗚呼哀哉太史執紼扶櫬南奔悼亡
殞涕惜別消魂敬陳短誄祇薦芳芹靈之穆矣鑒此清
樽尚饗

祭殷夫人文

代作

嗚呼師母胡歸之遽人亦有言積善疑祚昔謂其然今
見其誤難必者天或然者數花怨晨風薤晞朝露禍福
糾纏孰知其故緬念淑懿特鍾異賦容言功德無不備

具言相我師俾無內顧夫子志學劬茲朝暮井臼寅恭
珩璜警懼夫子迪貞贊惟儉素黜彼綺紈安此荆布偉
哉夫子蓬山獨步瓊珮揚芬金華振譽帝在潛宮經義
是傳言動有則開陳必屢帝紹寶曆甘盤是注風虎雲
龍千年際遇畜極初通久約方裕期爾偕老胡然中路
奄望閭風雲輶不駐靡衣而蠶靡蔭而樹厚積薄享聞
者嗟慕矧門下士荷師陶鑄剪拂毛甲示之矩度訓誨
捧持步趨依附欣戚情通門墻義固淑靈不作憂心回
互感師鼓盆呼天欲籲電光生滅浮雲散聚宇宙無窮
修短一趣惟是令聞圖史永著總帳風淒靈筵春暮束

帛可陳短衷欲訴凌風薦酹辨香是炷尚饗

祭南母文

嗚呼天生達人必予賢配子承義方亦由母誨有家咸
宜稱美自昔尊卑長少異情同適若宜人者其可以為
則矣我聞宜人少歸南公公績于學家務身叢百辛劬
劬孝于舅姑曰喪與祭咸克相夫有子曰軒叔後惟字
匪徒愛之而勞以義蚤賓于鄉宜人未置乃今登朝母
心始慰女志同行在古為難友于姊妹人得其歡嫂繼
兄室少以十齡宜人下之氣貌恂恂愛而有偏亦人之
情從女若子視猶已生家人而離每自婦人公之兄弟

更數十年而終無異心曰惟內助周旋維繫之寔勤也
公每宦游宜人必隨其家人望何時來歸公歸林泉宜
人攸託乃遽至此公誰與樂昔遺叔後庶其念我名成
登選謀歸不可方圖迎養而遽罹此禍嗚呼宜人遺勞
在公遺教在子遺愛在其家曷其有已此叔後之所以
肝摧腸裂而號呼不止也嗚呼是豈惟南氏一門哀不
能忘凡我四海同升聚此一堂方將砥礪學行討論文
章而叔後獨以憂去能不使師為弟子泣而友為友傷
也耶雖然修短何憑所貴不朽宜人之壽雖五十九然
乃憲伯之妻吉士之母龍章自天赫赫昭受麟趾發祥

蘭芽方茂天嗇其年而昌厥後嗚呼若宜人者其亦可
謂不朽矣千里寓莫渙淚潸潸情共愁雲達於渭南尚
饗

祭外母王孀人文代父作

嗚呼外母自庚戌涿郡之別經今六載餘矣豈憶天涯
聚散為生死永訣耶念昔內弟歷宦西曹奉外父母極
養余時商遊燕薊得侍顏色于時鳩杖鸞封孫子滿目
外父猶引首家鄉有懷昆弟伯叔娣姒甥姪內外幼子
童孫嘉日令辰每思歸娛言笑宛如昨也迨內弟出守
余卜歸未得客歲家鄉地變余妻及閭氏妹同與其厄

外母方榮養江南忽已報訃骨肉之變紛沓叢出追思
京邸之言邈焉異世矣哀哉哀哉尚忍言耶昔我先外
母孫氏淑貞相德艱辛佐家茂育子女寔大王宗不受
厥成中道告逝而外母安承其後當家之昌蓂車禘服
累綈列鼎榮享于生前金含絮襯彩紵文栢厚終于身
後且人生百感不及于心人事萬端不嬰其慮可謂優
適恬愉之至極者矣天道茫茫孰變孰常居者不作續
者不裳陰晴倏忽莫測其方陳牲告悽敬酌一觴余懷
悲矣地冬天長尚饗

祭楊老夫人文代作

繫嶽瀆之蘊靈兮氣鬱鬯而葱芊肆俊哲之欲降兮念
有開而必先惟令德以垂誨兮夜耿耿而和光內佑彰
而後裕兮矯天達而騰翰英茂蹕輦以四流兮彤闈待
而虛位爰遡夫國禎之所鍾兮靜娟修而衍瑞方獻霞
解以薦年兮胡雲輶之遽易河山慘慄而風淒兮朝紳
驚而興喟帝念戎勲之烜爍兮溥玄壤以豐恩命守臣
以宅其兆兮絲綸渙而春溫洵生順而歿榮兮亦奚異
乎永存曰余親化于河之陽兮挹休風而不諠觀總幄
以悲心兮敢修薦于蘋蘩靈赫赫其鑒茲下衷兮儼葆
蓋之續繡尚饗

祭楊老夫人文代作

嗚呼夫人胤德瑤瑜締賢閨閼壺範靜娟母儀烜杰於
相憲君矯矯風節越誨賢嗣達鴻肇揭橋梓騰休輝光
孔晰鸞帔霞章玄恩蕩洸桂茁蘭芽慈幃森列方慶含
飴奄悲泣玳瑁室馥淪婺宿光茂帝崇孝理悼念豐烈
綸音諭祀王人相穴曰余寒謫朱陳是結念德哀亡覽
衷惻切羈宦西陲東瞻哽咽玄輶臨旌素風戒節遙薦
鐘醑生芻是設馳辭告恫幽臺寧徹尚饗

祭張母文

嗚呼孺人葆淑在躬胤休千子和熊示慈登龍擅美振

奚通津恩榮方始錦帔霞章鸞封孔邇嗚呼孺人曾不
少俟遄駕玄輶閭風是止芳萎萱華悲貽盤匱某等義
共通家百年桑梓丹旛將旋有懷若燬敬采蘋蘩式陳
寅祀臨風酌觴敢申短誄尚饗

祭楊老夫人文代作

系衍望族德婉國華良玖蘊璞徽音嗣任熊九啓郢臺
儀孔蹕萱庭敷榮蘭堦競秀林林鶯鶯帔昭垂龍章
寵被天恩優渥奕世騰芳重闈襲慶休禎方朔寶婺煜
淪瑤池期近飄飄玄鶴氛胤告哀鈞天悼烈覃恩惟數
太史撰詞王人承祀豐碑是斷載命守臣牛眠卜兆擅

靈河嶽丹旄既陳玄冥在御還珍幽竈余忝觀風躬陳
常祀告虔總幄桂酒既清齊牲既具玄堂有覺

祭教老夫人文代作

嗚呼家之興也必有貞婦國之昌也必有純臣究代終
之攸職良事異而理因懿安人之休養兮寔邦家之通
珍淑芳潤於德閭兮聯喬門而締誼采蘋繫于沼沚兮
紉汀蘭與江芰菟中道而失天兮詠拒舟而矢志脫瑤
珥之芳華兮操冰霜以自肄晝紉絮以供世兮夜和熊
而訓嗣日炯炯而鑒精兮雲悠悠而掩泣肆偉嗣之揚
芬兮諒天命之不二紛既焯燿于衡廬兮對天聰而獻

記帝覽琳琅而嘉貺兮進文昌之右位蒞玉署而校才
兮慶琮璜之並致正辟離而振鐸兮都青衿而雲萃帝
念休功之豐碩兮推渥恩于所有頒綸綍之焜煌兮焜
驚章與霞帔荷百祿于北堂兮閱瓊枝之煥植肆母壽
而子榮兮環天紘而罕儷惟烈操與純誠兮允邦家之
景瑞胡秋露之宵凝兮欽巾施而永棄嗚呼人孰無生
亦孰無死存靡令名沒亦徒爾於惟夫人教埒軻母操
擬共姜始終一德左右三綱完名令節地久天長其等
聯階令嗣夙仰休芳載烹蕙饌式薦椒漿凌風告悃靈
格其洋洋饗

又代作

惟天純佑篤生英哲以昌人國慶源適追鑒觀自昔胎
教作則驪珠淵涵膏玉山蘊物理靡忒於惟淑靈葆儀
婉嫕豐宗廸哲胡天不辰中世訃訣含辛茹絕從一矢
躬遷三訓德遺宗是殖天鑒有赫鍾休賢胤作楨王國
金馬振綺銅龍揚藻清華載職出入北門表儀東序金
聲玉色帝命孔嘉教忠式穀繫母之德寵錫荐申純嘏
永綏恩暉罔極奄棄人間歸報夫君誓志以畢嗟惟胤
子匍匐九閭雲愁霧咽矧予同遊風懿久挹異彼行輶
載酤束芻凌風申誄內于素軾尚饗

又代作

嗚呼傳稱士德繫本母儀陰教式端箴史通垂猗惟淑
靈夙函貞懿亢德喬宗徽音茂似于何中道歛捐所天
栢舟矢志大義炳焉督撫遺孤邦之鉤石益然其休充
然其碩秉衡藝省綰綽承明彙彼泰茅征于帝庭卿聯
載陟振鐸賢關倬也士釗北斗泰山母情載怡母德蔚
章自天純佑耄齡降康更需繁祉粵錫兆釐申命寵綏
家國是毗胡然厭紛溢也遄逝母則歸全閭儀凋棄某
等胥倣嗣德備仰令慈桑梓孔懷倍百疇離南望於邑
賴藻匪將薄言虔誅詞短意長尚饗

祭裴母文

於惟孺人之生也含靈坤粹服正中閨螽斯衍慶百祿
孔來鸞章承寵德祐可稽痛惟孺人之逝也坤極隤危
城邑丘墟崑岡逸焰玉石與俱歿寧在德數厄焉如某
葭莩託好蘭蕙歆芳徽儀不作悱悵情傷丹旌戒御哀
酌玄觴尚饗

祭郭太夫人文

深淵龍蟠丹穴鳳起厚秀儲祥不爽其理天佑國家降
于卿士匪直父賢亦由母氏嗟太夫人秉德齊軌誕育
少傳教勤三徙橐筆彤墀延登端揆調燮宣猷聖明毗

倚申錫封褒鼎烹滌滄少傳孝思興懷陟祀累疏歸來
躬承甘旨佩玉垂魚晨昏堂祀寰寓稱榮豈惟閭里逾
八望九既多受社人間事畢歸報夫子板輿輟歡義輪
戢軌帝念舊臣遽失所恃乃按彝章乃錫葬祀恩數有
加增輝泉里韓山巖巖洹水瀰瀰不朽令儀同之終始
某等步塵少傳稔聞淑美哀訃忽傳盡哀靡已敬致束
芻爰擷芳芷短誄薦觴靈其監只

祭王太夫人文

嗚呼母德主慈惟天所昇若生若成劬勞一致嗟嗟明
靈溫惠獨至鞠我天鄉恩隆所恃適離襁褓匍匐顛躓

出入提携肩背是寄詢饑耐寒色憂顛顛衣之飼之以
藥以餌時則夫君旅遊遠地有待結褵奉姑從事俯育
不急仰承淑志夙夜其勤竟成哲嗣樹名策勲顯躋公
貳總率百官躬秉邦治機杼所貽萬方賴利文誥重茵
顯揚具備大耋康寧百年可企霜露戒辰忽傳襲襚青
鳥西歸遠邇興喟閔予玆疚匍匐苦次辱交天鄉風聞
芳懿作表北堂生成靡二慈訃遽傳遽增悲悸短詠陳
忱篚承蕉荔靈几有臨淒其薦觶尚饗